

He tangi hotuhotu e, ki ngā tamariki e tūkinotia nei. Haere koutou e te mano i kiia rā, ko koutou tēnei i katohia e Ihowa o ngā Mano hei putiputi ātaahua, whakahirahira rawa i tana māra putiputi kei te rangi. Haere, haere, haere.

Mō ngā whakaaroaro iho i runga i te kaupapa i horaina mai nei, ko te whānau, ka hanga whakahī au ki te whaikupu atu mō tāku ake. Kua toru ā māua tamariki ko taku wahine, katoakatoa tamariki iho i te rima tau. Hūuuri koaro pai (te whare, me ngā whakaaro katoa anōki o Māmā rāua ko Pāpā.)

He ahakoa, menemene kau anō ngā pāpāringa o tētahi, rewa tonu atu a Pāpā, hāunga a Māmā, he kōrero ke anō mōna!

Ahatia, ko wai au hei tohutohu, hei aha rānei i te mahi whakatupu tamariki e hanga tamariki tonu nei anō ko au? Nō reira, e whai nei ko ētahi kitenga noa ake ōku i waenganui i aku tamariki mei kore tētahi atu e whai hua i aua kitenga. (Ēnei kōrero katoa, e hāngai ana ki āku ake tamariki, ainei pea hore kau kē he pātanga ki wā ētahi atu).

1. Ko ngā tamariki te kāpia e piri tonu ai ngā mātua

Whakapono ana au pau te kaha, pēnā kua ā māua tamariki ko taku wahine – kua mahue noa atu māua. Ae rā, tērā noa atu ngā take e whai wāhi mai ana, erangi e pēnei mārika ana ō māua whakaaro tāhi. I muā atu i te whānauanga mai o ā māua tamariki,

he tautohetohe te mahi, ko ngā take i tautohetohe ai he tino koretake rawa atu. Wera ana ngā toto i te tamarikitanga ai, aha ana rānei i pēnei ai. Horekau aku whakamā ki te hura i ēnei mea ki a koe i runga i taku mōhio, te nuinga o ngā kāpara taitamariki e pēnei ana anōki. Ka whānau mai ngā tamariki nei, ka tau te rangimārie (hāunga ētahi wā ka kōrerohia a taihoa). Tahī au ka hinga atu ki te rapurapu, nā te aha? E mara, ehara i te mea nā te aha, nā te NGENGE. Ka pau tō kaha i ō mahi i te awatea, i ō mahi tiaki i ō tamariki i te pō, me pēhea e toe ai he ngoi mō te tautohetohe? Ko ngā tautohetohe i tirohia ai he mea nui i mua, nō te whaitamarikitanga – ka takekore noa iho. Ainei pea he painga huna tēnei kei roto i te whaitamarikitanga.

2. Kia mataara i te wā i muringa tonu mai i te whānautanga

Ko ā māua tamariki e toru nei, i muri tonu mai i te whānautanga o tēnā, o tēnā, ka parori māua. He aha i pēnei ai? Ekore e kore he maha ngā take, he ngenge, he kore nō te tinana, te hinengaro, te aha, e taunga ki tērā tūāhua ara tonu i te pō, motuhake tō ao katoa, ka huri āwhiowhio i taua pēpi. Ahatia, ko te mea kē, kia mārāma ngā mātua hanga tamariki nei pēnei i a māua, kei konā taua taniwha e tatari ana ki te hopu i a koe, me te whakawehewehe i a korua ko tō hoa. He aha te rongoā? Ko ō māua whānau. Tēnei tikanga tūturu nā tāua, nā te Māori i mua. Ehara i te mea, kotahi anō tangata e tiaki ana, erangi, ko te whānau katoa. Pēhea atu te pai, mēnā e taea ana ētahi o aua tikanga te whakahoki mai?



3. Ko te whānau whānui hei tānga manawa

Ka hauwarea tō māua moe ko taku wahine, ka peke mai ngā hungawai, ngā mātua ki te āwhina i te pikau. Ehara pea i te whakaaro ki a māua, erangi he aroha kē ki ngā tamariki. Pēnā horekau he whānau hei āwhina mai, tēnā pea hei ngā hoa. Ka kore i tērā, ko ngā rōpū āwhina i te whānau. Kua tātou e whakamā ki te rapu āwhina. Ko ngā Pāpā pea ngā mea kaha te pāngia e tēnei mate.

Heoi, ahakoa te āhua o taku whakatakoto i aku whakaaro, ehara i te kauhau, he kongakonga kau me tipako ake i tōku ake ao hei āpitianga ki ngā whakaaro o ētahi. Ko taua kōrero rā anō rā nē...

Ki te toua atu he paukena, ka tupu he paukena. He iwi paukena tātou? Atawhaitia ā tātou tamariki anō nei, horekau atu he mea kē atu o te ao nei.

Whakanuihia ana ngā takoha tino nui mō ngā āhuatanga Whakawhanaunga ā-Iwi

Ko Te Taura Whiri i te Reo Māori tētahi i te tōpūtanga o ngā rōpū tekau mā tāhi o ngā whakahaere i whiwhi i te tohu mai i te Kāhui Tika Tāngata e tautuhi ana i te takoha nei ki ngā āhuatanga whakawhanaunga ā-iwi ki Aotearoa. Ko ngā kaiwhakauru o te tōpūtanga nei o te New Zealand Diversity Action Programme (NZDAP) kua kōwhiria mai i ngā whakahaere e rua rau i uru

mō ā rātou mahi nui mō te kanorau i te tau kua hori.

He hono, he whakatairanga te mahi a NZDAF i ngā whakahaere e hiahia ana ki te whakapai ake i te kanorau ahurea me te whakawhanaunga ā-iwi i roto i ō rātou hapori. Ko te kaikōmihana mō te Whakawhanaunga ā-Iwi me te Kāhui Tika Tāngata te takawaenga i te hōtaka.

